

東華錄

順治二十四

臣王先謙敬編

臣周潤
論著恭校

順治十二年乙未春正月丙戌朔朝鮮來貢○戊子兩廣總督李率泰奏請西土賊偽總兵廖篤增等負隅作梗結連西逆官兵分道進剿陣斬篤增於玉叛巢又賊渠李先芳廖鳳等盤踞藤縣遙爲李定國聲援定藩左翼總兵官馬雄攻之生擒偽知府姜炎斬獲無算下兵部察敘○庚寅免山東東平濟陽等十八州縣去年被水額賦○多羅貝勒巴爾處渾薨諡和惠○癸巳以祖重光爲陝西按察使

由江西湖西道參政遷

高士俊爲四川按察使

由河南大梁道參政遷

乙未免直隸八府及河南彰德衛輝懷慶去年被水額賦○戊戌諭諸王大臣等昔皇考上賓朕方六歲正在幼冲當時諸王大

臣同心推戴嗣紹丕基及定鼎京師奄有四海睿王無政朕
惟拱手以承祭祀凡天下國家之事朕既不預亦不有向朕詳陳
者故於滿兵之艱辛人民之疾苦原未周知自朕親政以來五年
於茲焦心勞思以求化理夙夜祇懼不敢雍容日望諸王大臣以
嘉謨嘉猷入告匡救其失而輔其不逮乃繼圉未靖水旱頻仍吏
治惰污民生憔悴錢糧侵欠兵食不充教化未孚綱紀不立保邦
致治之道迄今未得其要領朕思諸王大臣皆親見太祖太宗
宗創業垂統之艱難年來闢地綏民之不易必有長策以裨治安
而未見有直言得失者豈朕聽之不聰而虛懷納諫有未盡歟何
相率而默默也以天下之大機務之繁責於一人而弗圖勵翼朕
雖涼德獨不念太祖太宗培養之恩乎撓厥存心或以爲奉
命議事止宜將順而行否則緘口容身可保富貴試熟思之天下

未平富貴能長保乎以後凡養兵愛民興利除害有關政治者居則深思進則敷奏各抒忠盡以慰朕懷至於當事諸臣因循積弊僅以簿書爲務不肯精思職掌擢大事發正言以圖實濟國計民生將何賴焉內外大小各官專爲身謀罔念官守容容充位望缺希遷祿秩是營恩怨不化真心爲國殆鮮其人前御史吳達謂滿朝大小各官盡皆臃腫朕以爲出言太過由今觀之似不誣矣茲復開誠切諭務痛加省改有官守者必盡其職有言責者必盡其言弼德塞違期臻郅治君臣上下俱有令聞豈不美哉○封豫郡王多鐸次子察尼爲貝勒○吏部議覆給事中朱徽奏吏部司官一年內升一人外轉一人科員一年內升二人外轉二人御史二年內升三人外轉三人司道除升巡撫外每年亦內升三人其司道內升滿洲不論科目漢人仍以科目出身爲限必查其曾舉卓

異俸薦俱優者方准內升此外若又有缺出則以在京衙門應升之人補用從之○己亥諭滿洲武弁兵丁等朕以涼德藐躬續承祖宗鴻業十有二年矣睿王時朕年冲幼未預政務爾等將士艱難疾苦無由悉知自親政以來五年於茲各官竟未有以爾等疾苦入告者意爾等居官者自有俸祿充伍者自有月餉足以瞻養耳近聞生計蕭條僕逃馬斃而又各處征勦整理器械久在行間不得安處且年來水旱頻仍秋成莫望無以聊生此皆朕不德所致也睿王時爾等心期口誦望朕於何日親政又安天下共享太平豈料竟虛所望言念及此夙夜焦思寢食俱廢矣嗟爾將士等披堅執銳露宿風餐汗馬血戰出百死一生以開拓天下勞苦如斯朕豈忍復靳恩賞有稽郵賚但今封疆未靖需用繁多百姓未甯錢糧通額是以朕懷莫慰朕爲天下之主於爾等將士竟未

加惠而爾等仍勵初心爲國效力此皆追念 太祖 太宗育養

深恩而報之於朕也爾等如此盡心朕豈時刻有忘稍俟豐足卽

沛恩施爾等其各知朕意○辛丑諭吏部朕惟賢才難得政事需

人必舍短以取長宜計功而忘過特頒恩命圖任舊臣原任吏部

尙書韓岱原任固山額真伊爾德阿喇善等俱從 太祖 太宗

時效力或膺部伍勤劬或佐戎行勞苦若以一眚終錮朕心不忍

茲特復其原任韓岱爲吏部尙書伊爾德阿喇善爲固山額真赦

過宥罪旣宏施雨露之恩盡職奉公宜益勵冰霜之操尙其永念

勿負朕心○壬寅命考選軍政照文官例卓異者賜服旌勸○癸

卯以于時躍爲右僉都御史巡撫廣西

由湖廣驛傳
道副使遷

○甲辰諭吏

部等衙門人君圖治當虛已以求言臣子効忠必有猷而入告年

來水旱相仍于戈未息滿洲兵丁困苦至極飢寒日姓轉徙死亡

雖朕之涼德實因臣下政事不修兵民失業弭救無策致此多艱
在京七品以上文武滿漢官員俱宜殫竭忠誠共圖補救凡職掌
所屬向來積弊之處見今整頓之方詳切敷陳以資採用知其病
卽備其藥言其害卽舉其利其務各抒所見毋得浮泛空言雷同
塞責負朕求言至意如兵民疾苦拯救事宜果有確見良籌雖非
職掌亦許另疏具奏○諭吏部朕撫育萬方夙夜祇懼講求愛民
之道不啻三令五申乃年來水旱相仍干戈未靖民窮莫拯兵食
不充上德弗宣下情壅塞所以致此弊非一端朕已廣開言路博
詢化理復念天下至大民物土俗所在不同地方各官身親實歷
凡兵民疾苦政事利弊必皆灼知於心耳聞目見最爲真切今文
官自督撫以下知府以上武官自提鎮總兵官以下副將以上管
轄之內職掌事宜向來積弊何以得清見今整頓如何而可俱著

詳切直陳無隱以資採用司道知府副將著各陳奏一次以副朕周諮勤民至意○諭吏部都察院及科道官員曰三年以來水旱相仍干戈未息飢窘人民轉徙溝壑滿洲兵士困苦無聊災變未弭時艱莫救其故安在意者朕躬之有闕用人之不當行政之失宜以致是歟抑諸王貝勒大臣或有勵翼未盡而然歟前曾有旨命言官直陳時事無論當否概予優容後乃分別是非問生譴謫致生疑畏之心竟奏數陳未免瞻顧兵民疾苦不得上聞今廣開言路博詢化理凡事關朕躬者何令不信何政未修諸王貝勒辦事諸臣曠職之愆叢弊之處及內外各司何害未除何利未興各據見聞極言無隱須詳明切實庶便覽觀一切啟迪朕躬匡扶國政者所言果是卽與採用如有未當必不加罪毋得浮泛塞責負朕求言至意○諭吏部朕有天下皆我太祖太宗積德施仁

開創鴻緒以貽藐躬朕既爲生民主一夫不獲時虞朕衷念自明
運式微流賊煽亂朕奉 天承命救民於水火之中率土人民如
依父母以爲必蒙愛育得享昇平豈意比年以來水旱頻仍干戈
未靖轉輸旁午人不聊生蕩析離居鬻及妻子煢煢無告展轉呼
號想其怨咨必歸於朕言念及此何以仰副 祖宗付託之意中
夜以興潛焉出涕雖未能減賦蠲租實欲除苛去甚與良有司共
圖休養已有諭旨令內外大小官員悉心條奏通達下情自今以
後各地方錢糧凡橫斂私徵暗加火耗荒田逃戶灑派包賠非時
豫徵蠲免不實災傷遲報踏勘騷擾妄興詞訟妨奪農時等弊一
切嚴行禁革有違犯者該督撫卽行糾參以憑重處如督撫徇情
庇縱部院科道官訪實劾奏○丙午 御製資政要覽 親爲序
曰朕惟帝王爲政賢哲修身莫不本於德而成於學如大匠以規

矩而定方圓樂師以六律而正五音凡古人嘉言善行載於典籍者皆修己治人之方可施於今者也朕孜孜圖治學於古訓覽四書五經通鑑等編得其梗概推之十三經二十一史及諸子之不悖於聖經者莫不蘊涵事理成一家言但卷帙浩繁若以之教人恐未能一時盡解其義亦未能一時盡得其書因思夫記事宜提其要纂言當鉤其元乃採集諸書中之關於政事者爲三十篇又慮其渙而無統於是每篇貫以大義聯其文詞於忠臣孝子賢人廉吏畧舉事迹其好貪不肖悖亂者亦載其內使法戒炯然加之訓詁詳其證據譬之萃衆白以爲裘范六金而成鼎旨約而易明文簡而易閱名曰資政要覽觀是書者熟思而體之可以爲篤信之善人推類而廣之可以爲明理之君子毋徒求之語言文字之間則朕諄諄教諭之心庶乎其不虛矣○左都御史屠賴等奏愛

民莫先除害近聞八旗投充之人自帶本身田產外又任意私添或指鄰近之地據爲己業或連他人之產隱避差徭被占之民既難控訴國課亦爲虧減上下交困莫此爲甚宜敕戶部將投充之人照原投部檔查覈給地外其多占地畝卽退還原主庶民累稍甦租賦亦增又年來因逃入衆多立法不得不嚴但逃人三次始絞窩主一次卽斬又將鄰右流徙非法之平竊謂逃人如有窩主者逃入處死卽將窩主家產入口斷給逃人之主兩鄰中長責懲該管官員議處無主者仍鞭一百給主其自投歸主及窩主首出者俱照例免議庶逃人少而無辜之株連者亦少再如建言降革諸科道已蒙特旨令吏部開列事由奏請查降調禮部郎中郭一鵬流徙詞臣李呈祥侍郎魏琯等其罪雖分輕重實皆由於進言似應一併開列以候 睿裁庶不虛有過惜才之盛典得旨著議

政王貝勒大臣九卿詹事科道等官會議具奏○丁未鎮國公巴布泰卒諡恪僖○命胡兆龍以侍郎銜仍在內院辦事以李爽棠爲禮部右侍郎

山國史院學士遷

○庚戌

御製勸善要言成 親爲序

曰朕惟天道至善卽以其善賦之下民故人之生無有不善其或有不善者皆因內蔽於私欲外染於污習遂失其繼善成性之本而日遠於天矣人之存心行事不同是以上天鑒察降以災祥其降祥者固以顯佑善人其不得已而降災者亦以明戒下民使之改過而遷於善也從來報應昭昭不爽詎不可畏哉古人原天垂訓以教天下正論嘉言不一而足但文之深者或不易通言之簡者又不能盡狀恭承 天命撫育萬方深念上之教世勸善爲先人之立身爲善最樂故取諸書之要者輯爲一編名曰勸善要言語不欲文期於明理詞不厭詳期於曉衆欲使貧愚同喻小大共

知讀此書者當深思其義反之於心體之於身善者則益當加勉而進於涓良以求吉慶其或無知而誤染於不善者尤當速改而歸於無過以免災戾庶幾不負上天好生之心而朕殷殷教化之意亦不虛矣凡我人民其敬勉之哉○辛亥諭大學士額色黑等朕惟平治天下莫大乎教化之廣宣鼓動人心莫先於觀摩之有象夫精微之道難喻顯蒙而質樸之言未詳證據茲欲將歷代經史所載凡忠臣義士孝子順孫賢臣廉吏貞婦烈女及奸貪鄙詐愚不肖等分別門類勒成一書以彰法戒名之曰順治大訓卽於新春開館特命額色黑金之俊呂宮爲總裁官能圖張懸錫李蔚爲副總裁官卿等受茲委任須協力同心殫思博採務令臣民皆可誦習懣感興起無負朕惓惓化導之意○壬子諭內外文武官員等朕每思與朕共理天下者惟爾內外文武諸臣是賴已有諭

旨自朕躬闕失以及政事未當之處俱令各官悉心條奏採擇施行茲以朕思慮所及先頒敕諭著令該管衙門作速遵奉興利除害稱朕祗承天意周恤民隱至懷一知府乃吏治之本若盡得其人天下何患不治今各處知府百有餘員其最要者如直隸之宣保河間江南之江甯淮揚蘇松常鎮浙江之杭嘉湖紹山東之濟南青兗山西之太原平陽河南之開封彰德陝西之西安延安江西之南昌吉安湖廣之武昌荆襄福建之福州泉州共三十府或政事殷繁或地方扼要知府之任尤宜得人如不得其人致彼參劾迎送勞擾公務廢弛交代之際吏胥作奸爲害甚大與其參之於後莫若慎之於先著在京各衙門滿漢堂官三品以上及在外督撫各舉才行兼優堪任知府者一人詳開履歷事蹟具奏吏部再加察議奏請定奪以備前三十處知府之用如遇缺出仍開

列正陪候旨黜用其餘各府且照近例行有薦舉徇私及推諉不薦者議處湖南四川兩廣等處用兵地方聽該督撫選擇題用一歷代州縣之制自漢以來皆以人戶分大小隋有開闢衝要之等唐有赤畿望緊之差明時因之酌爲繁簡定有成例隨才器使各盡其用今錢糧未嘗不公但精明強幹者或置於簡僻無可展布而劇要地方或以付衰弱之人致公事廢弛錢糧侵欠雖加罪責事已莫追著吏部詳察舊例參酌時宜將地方分爲三等具疏奏奪應選官員考其身言書判精加揀擇亦分三等具奏上等者列名引見候朕面定方將上等之缺從公掣籤其考居二等者授二等地方三等者授三等地方不必引見俱從公掣籤錢務使州縣各官人地相稱一水旱災荒古今代有全在豫備得法一省報荒必有不荒之府一府報荒必有不荒之縣荒者當速賑不荒者卽當

早備如常平倉之法米賤則增價以糴米貴則價減以糶官民俱
便歷代之未嘗有改明宣德年間巡撫周忱與蘇州知府況鐘
多方儲積蘇州一府至六十餘萬石松常二府何不與焉春夏濟
農秋冬還官民至今稱之若各地方官果有爲國爲民之心豈不
能於存留項下周詳設處著戶部嚴飭遵行一賦役原有定額自
流賊煽亂之後人丁逃散地畝荒蕪奸民乘機透漏良善株累包
賠或有田而無糧或有糧而無地或有丁而無差或有差而無丁
甘苦不均病民殊甚著各布政使嚴飭該道府責令州縣官查照
舊冊著落里甲逐一清釐隱漏者自首免罪包賠者准其控告查
確卽與豁免不許藉端擾害事畢造冊報部以憑覆覈卽以查出
多寡分別各官殿最至於屯道屯廳奪民熟田擅充開荒及墾少
報多令民包納者一體清查俾無重納以寬民力其河東長蘆等

處各運司鹽課原應商人辦納中有每年派民納課而民不見升
合之鹽者著該運司詳加稽覈從長計議務令公私兩便經久可
行毋得因循積弊一有司賢否全憑督撫舉劾而督撫又寄耳目
於司道府推層層開報原期詳覈近乃上下扶同以饒遺之厚薄
情面之大小顛倒貪廉俾循良不獲上達奸婪反膺優考勸懲不
公吏治因之大壞以後責令司道府推一應官評務要細開事蹟
轉報督撫逐件確覈如開報不實卽先指名奏參至督撫薦詒據
事直陳不得仍襲浮辭故套如止憑開報不親自體訪覈實以致
賢否混淆事發一體究治一設立學校原以養育人才爲將來治
民之用著各提學官查照舊制優獎德行有敗羣不檢者確訪黜
懲分別優劣務要公嚴有司教官不得徇情通賄濫舉優行私費
譽誣捏送劣行向來情弊每有不肖之尤自知論共棄畏罪鑽

營濫膺優舉或有原非甚劣偶因別事觸犯官吏遂挾恨主使以
不檢開送尤爲可恨俱著嚴行飭禁違者事發治罪一瀕河郡縣
田土盡湮各地方協濟河工一束之草賠銀數錢徵調繁興侵那
萬狀河夫工食不能時給物力已竭續用未成中原重地人民苦
累半由於此自今以後該督各官務宜親駐河干解到人夫物料
嚴覈數目乘時修築工食價值毋得短減有仍前作弊者從嚴題
參立即拏究期在早竣以蘇民困一近來各處驛遞疲累至極衝
要地方尤爲苦困皆因馬價草料工食等銀不敷支用民力旣窮
馬亦隨斃買補之費仍出於民民困如此勢必至驛政盡壞道路
不通著戶兵二部行各督撫察地方衝僻及路程遠近每驛應用
馬匹草豆鞍轡夫役工食數目錢糧見額若干應補若干逐一確
算造冊奏報應用錢糧准於應解正項錢糧內動支原解缺額該